

De passa 10.000 te la mont de Poza

La terza edizion de la Festa ta Mont à chiamà per doi dis te Val de Sèn Nicolò n muion de jent, che à podù aprijar l bon temp, la bona organisazion e la bona cojina



Te Saùch, Mesaselva e Ciampié i organisadores e i voluntadives de la Festa ta Mont à sport musega, magnadiva e spas per duc. (foto de Anton Sessa e Robert Bernard dal sit: www.festatamont.it)

Val de Sèn Nicolò - Ence chest an l soreie à bossà la Val de Sèn Nicolò fajan sia part emportanta per far garatar al miec la bela "Festa ta Mont", per la sodesfazion di cent e cent voluntadives de dute le sociazion da Poza e da autres paijes, che con gran empegn e gaissa i se à dat jù per la terza edizion de chesta bela manifestazion.

Musega, golosarie de ogne sort da magnar e da beiver, jeghes e entrategnimenc per picoi e per gregn, spetàcoi su le lejende e contie ladine, dut chest e auter amò à troà lèrga sabeda e domenia passé te la mont de Poza, ai pie de Col Ombert, che da sera se à enlumenà per tramudar la val te n ream encantà.

Na ventina la tieje e cjaiae olache i voluntadives de le sociazion de Giagres, Alpins, Studafech, Crousc Chécena, Musega da Poza, Fascia Balon, Hockey Fascia, Ski Team, Rode a Motor, Jent da Mont, Socors, ADVSP, Sommelier, Zircol Jent de età, Cor de geja de Poza, Bambi, Freinademetz e Operazione Mato Grosso, se à metù a la leta per endrezar, enjgnar, cojinar, dar fora e sporjer de ogne sort de roba.

Presciapoch de 8000 i é rué ite demò coi 11 pulmins che jia e vegnia dò e dò anter Vidor e Saùch (autres 2 pulmins jia inant e endò da Vich e Pera) e amò n muie, troes più che l'an passà, l'é stat chi rué ite a pe, ite per la val o da

Buface ju. L'é stat calcolà che ti doi dis sie ruà ite passa 10.000 jent, per la sodesfazion di componenc del Comitad de endrez, che jai 3 egn i à abù chesta bela pissada e i ge à donà ence a Poza na bela festa, una de più bele de l'istà fascian. Te chest comitat, apede al president Roberto Bertacco, l'é Edy Croce de Bocol, Giancarlo Dorich Cavei, Fausto Lorenz de Jan, Bernardino Zulian Cuz, Francesca Degasper de Gac, Lino Detomas da l'Ansol, Giulio Florian de Ciout e Emanuele Pezzei de Tach. Apede ic l'é da recordar Tullio Dellagiacomà Malghèr, che ades per la neva enciaria de ombolt de Poza no l'é più tel Comitad, ma de segur l'é

sempre apede a chesta festa, che ge dasc luster e parbuda al paisc.

La festa é tacada via jà l vender te paisc, con la prejentazion del program da sera te piaz de Comun e amò dant, te tendon, col spetàcol "Stories de Fanes", che à menà la jent tel mond de le contie, de Dolasila, Ey de Net e l catif Spina de Mul. N spetàcol endrezà da l'Istitut Cultural Ladin e metù a jir ence la sabeda domesdi ta mont, olache Noemi Iori, Giacomo Anderle, La Zag, Fabio Chiocchetti e Mario Solari ge à dat ousc ai ciantastories da zacan con tesé e museghe n muie aprijade. L ream de Fanes é stat dapò l tem ence del spetàcol endrezà da sera ta mont, che chest an à volù proar

na formula desferenta. Te Saùch, sabeda e domenia sera n grop de atores fascegn à portà dant "cadres vivenc" scric e endrezé da Nicola Merli, che se enterzaa con l video "Fanes Poem Musical", tesé de Roland Verra e museghe de Susy Rottonara. Na sperimentazion che à mescedà museghe e citazion desferente, momenc dramathiches e autres comiches, ma che aboncont tel resultat final, enceben la braura di atores, no l'à ret e no l'à contentà le spetadive del publich, e fosc l cognessa vegnir pissà fora mingol autramenter, salvan la idea segur da aprijar de la colaborazion interladina.

Lucia Gross

